

statuit illustris Leibnizius cum cl. Wolfio suo assecla; quas breviter tantum proposui præfatæ Disputationis §. 45-49. heic inde repetendas.

XI. Prima species simplicium secundum ipsos est eorum, quæ mundum obscure sine ulla distinctione repræsentant. Hæc simplicia sunt indivisibilia, & sine partibus. Nec tamen sunt Epicureorum Atomia: nam non habent figuram, aut quantitatem, aut quicquam, quod materiæ convenit. Ino spiritus possunt vocari; habent enim naturam mundum obscurius repræsentandi. Tales sunt Leibnizianæ Monades quarum nova scientia dicitur novo nomine *Monadologia*. Ex hisce simplicibus elementaribus, sive monadibus, & quasi spiritibus, hic mundus est compositus, & omnia mundi corpora. Porro animæ hominum & brutorum videntur aliquando in hoc statu fuisse, priusquam in hoc corpus venerint. Hæc est præexistentia earum, & quam secuta dicitur transformatio in creaturas rationales.

XII. Secunda species simplicium est eorum, quæ mundum repræsentant clare, sed indistincte, qualia sunt animæ brutorum.

XIII. Tertia species est eorum, quæ mundum clare & distincte repræsentant, qualia sunt nostræ animæ.

XIV. Quartus repræsentandi modus est intellectus Divini, qui est repræsentatio simultanea & distincta omnium possibilium.

XV. Singula hæc simplicia tantum gradibus facultatis repræsentativæ inter se differre dicuntur.

XVI. Hinc spiritus in genere definitur, quod sit substantia universi repræsentativa, sive peculiaris.

XVII. Differentiæ vero specificæ desumptæ sunt a modo repræsentandi universum, qui in infinitum variari potest.

XVIII. Hæc philosophemata iudico examen rigidum mereri. Observo i. in genere, in iis non posse animadverti lucem, qua Cl. Wolfius se delectari innuit, sed meras tenebras. Quis enim intelligeret simplicia illa elementaria, monades, & quasi spiritus; quæ sint indivisibilia, sine partibus, nec habeant figuram, aut quantitatem, aut quicquam, quod materiæ convenit: & tamen ex iis hic mundus dicitur esse compositus, & omnia mundi corpora? Quomodo simplicia, quæ partes non habent, nec figuram, nec quantitatem, &c. mundum & omnia mundi corpora constituere possunt? Quomodo mundum repræsentant obscurius, clariss, aut distinctius?

An